

Деепричастие. Піріктіріс, пірге паза итірбинчеткен деепричастиелер

Деепричастие – иділістің сырайча хубулбинчатхан формаларының пірсі полча. Ол литература тілінде, прай диалекттерде аллығ киректелче.


Деепричастиелер өөн действиее өң-пасха хоза действиелерні таныхтапчалар: өөн действиенің алнында алай ба аннаң тиңе (пір туста) иртчеткен действиелерні, өөн действиенің **сылтаа, ондайы, пөгіні, сині** полчатхан действиелерні таныхтапчалар.

Синтаксис саринаң деепричастиелер чоохтағда, иң удаа обстоятельство полчалар: дейстvie ондайынан, тус, сылтағ, пөгін, син. Теести палғалыстығ хадыл чоохтағларда деепричастие формалары сказуемай даа полчалар.

Палғалысчатхан сөстерінең хада деепричастие формалары деепричастиеліг чоох кизегі (оборот) пүдірчелер.

Тузазы хоостыра деепричастиелер мындағ пөліктерге чарылчалар:

- а) піріктіріс деепричастиезі (-ып, -іп, -п);
- б) пірге деепричастие (-а, -е, -и);
- в) итірбинчеткен деепричастие (-бин, -пин, -мин);
- г) син деепричастиезі –**ғанча** (-генче...) аффикстіг;
–**ғали** (-гели...) аффикстіг.



Піріктіріс деепричастие (-ып/-іп/-п)

Піріктіріс деепричастие, иділістің өөніне (төстігіне) –**ып/-іп** (согласнайға тоозылчатса), **-п** (гласнайға тоозылчатса) аффикстер хозылып, пүтчелер:

паз-ып (пас-ып - паз-ып)

киз-іп (кис-іп — киз-іп)

киз-іп (кис-іп — киз-іп)

чар-ып, көр-іп, сана-п, көсте-п.

Ғ, г, ң, п согласнайларға тоозылчатхан иділістердең піріктіріс деепричастие формазын пүдірзе, төстіктің соондағы согласнайлары түс халчалар, орнында узун гласнайлар пүт парчалар: **чыып** (<чығ-ып), **саап** (<сағ+ып), **үйп** (<үй+іп), **тооп** (<тоң+ып), **таап** (<тап+ып), **тееп** (<теп+іп).

Піріктіріс деепричастиенің тузалары:

1. өөн действиенің алнында иртчеткен (ирткен, иртер) действиелерні таныхтапча: *Ипчі, көөлче **турып**, улуз тыныбысхан, анаң, сөөде **изебізип**, ибзер **кір парыбысхан** (Н.Д.). Адының сузулузун **суурыбызып**, **Атик апсах** аны аңмар столбазына **палгабысхан** (И.К.). Наа килген кізі, чүк хабын чар үстүне ипти **тургызып**, хыриндағы көк от аразын **көрглеп**, сыйби **тартып**, агырин харчынахти одырыбысхан (М.Т.).*

2. Өөн действиенің пір туста, аннан тине иртчеткен хоза действиені: *Күрген кистінең чоон чохыр адай, **хаңылап**, **хыңзып**, **үріп**, ойлап килген, соонда чурух-чарыхха төөй хара ниме **сөртеліп** одырган (Н.Д.).*

*Чол хазындағы нымырттар кистінең хайдаг-да хызычак, туңмачаан, **чидектеп**, холларындағы нымырт салааларының чистектерін **тееріп**, чіп ала, көрін килгеннер (К.Н.).*

Хоза действие өөн действиенің пір туста иртірілчеткенін уламох іле идер үчүн, деепричастиенің соонда удаа **АЛА** кизегес хозылча: *Ниме-де **сагынып ала**, хыл пагны урухтир иде тоңнабысхан (М.Т.).*

*Ограда ізігінең сыгара **ойлап**, аал аразынча **ылгап ала** чүгүр сыххан (А.Х.).*

3. Піріктіріс деепричастие ідөк өөн действиенің підірии полчатхан действиені таныхтапча: *Землянканың ізігін **чаабызып**, свечі тамызыбысханнар, тимір пеес **күүлеп** көйче (М.К.). ...аңдарыл парган кізіні, ол халды тіп, **тастап** чөрібістірлер (К.Н.). Кізілер амыр одырлапчатхан. Хайзылары одырганнар, **сабыхсып** (В.М.). Чулгыс-Торчых ла, ахсын **ас салып**, пичел чох харахтарын*

аар-пеер чүгүрте айландыр турган (К.Н.).

Мындаг тузалыг піріктіріс деепричастиелер амгы тілде удаа, действие тузазын чідір салып, наречие пол парчалар: *хатап, чадап, сынап, орыстап*, аннаң даа пасхалары.

4. Өөн действиенің сылтаан таныхтапчалар: *Андаг хабарны **истіп**, мин өрін паргам... (И.К.). Оң сариндагы тууп харланчыхты сыйбап салган Сакис, Олакайның сырайы хуурта тарт парганын **сизініп** (К.Н.). Сагдай сарыг тайны көрбеен, Сабис, **азырып**, ибге наньбысхан тіп, сагынган (Н.Д.). Оолах, палгастыг чолда **тайлыx парып**, аңдарыл парган.*

5. Өөн действиенің пөгінін таныхтапчалар: *Че хараа сай, ниме-де **кілеп**, деревняны үтестірген... (Н.Д.). Прайзы, мині **үдезіп**, тасхар сыхханнар (И.К.). Сабис пазох хараан нуубысхан, Марикті пазох көрерге **ізеніп** (Н.Д.).*

Піреде піріктіріс деепричастие формазы хаталча, андада ол хати-хати иртірілген действиені таныхтапча: *Хойларын **санап-санап**, тооспады. Хыныг книганы **хыгырып-хыгырып**, кўннің ирткенін дее пілбин халганнар.*

Пірге деепричастие (-а, -е)

Пірге деепричастие, согласнайға тоозылчатхан иділістің төстігіне (өөніне) –**а(-е)** аффикс хозылып, пүтче: *пар+а, чөр+е, тогын+а, хаб+а, саг+а, пөг+е.*

Гласнайға тоозылчатхан төстіктерде төстіктің соондағы гласнай паза аффикстің гласнайы, хозылып, пір **И** гласнайға айлан парчалар: ***ойни** (<ойна+а), **сини** (<сине+е).* Андаг **И** пір букванаң пазылча.

Ғ, Г согласнайларға тоозылчатхан иділістердең пірге деепричастие формазын пүдірзе, согласнайлар, ікі гласнайларның аразында пол парып, түс халчалар, орныларында узун гласнай пүт парча: ***чыы** (<чыг+а), **йү** (<йүг+е), **сии** (<сиг+е), **поо** (<пог+а).*

Пірге деепричастие өөн действиенең пір туста, тың палғалыстыг тине иртчетен действиені таныхтапча: *Анзы, тур киліп, көзенек чаринда көріндеске **көріне**, сазын таран турган (И.К.). Ізік наагында, аргазынаң иркінге **чөлене**, аалның паза пір пайы одырған – Күрдей (К.Н.).*

Пірге деепричастие, піріктіріс деепричастиеөк чілі, удаа **ла** (**ле**) кизегестернең хада киректелче.

Андада ол деепричастиененң пілдіріл парған действие тоозыл парзох, сах андох өөн действие пасталчатханын таныхтыпча: *Өрінгеніме уйғум даа чіт парды, че чылығ ибге кіріп, **чада ла** узубысхам (Г. Т.). Аны **исте ле**, Торканың харахтары улуг азылыбысханнар (В.К.). “Мин синің Чохырааңны **көре ле** танып салғам”, – тапсабысхан Чабус...(В.К.).*

Итірбинчеткен деепричастие (-бин/-пин/-мин)

Итірбинчеткен деепричастие формази иділістің төстігіне алай өөніне **-мин** (**м, н, ң** согласнайларға тоозылчатса), **-бин** (гласнайларға паза, **м, н, ң** согласнайлардаң пасха, үнниг согласнайларға тоозылчатса), **-пин** (туных согласнайларға тоозылчатса) аффикс хозылып, пүтче.

Итірбинчеткен деепричастие тузази хоостыра піріктіріс паза пірге деепричастиеелерниң тузаларына төөй. Че ол өөн действие өң-пасха хоза действиеелерниң иртірілбинчеткенін таныхтапча:

а) өөн действиениң алнында ирткен действиениң иртірілбеенін: *Карим, оларны **сагыбин**, яблах хазарға настабысхан. “Анымчох”, - тооза чоогын **испин**, Элиза агас арали настыра халған (Г.Т.);*

б) өөн действиениң ондайын, хайди иртчеткенін таныхтапча: *Күннер **пілдіртпин** иртіп одырған (Н.Тюкп.). Олар, мині **нимее салбин**, көнізінең чоох **апарчалар** (Г.К.);*

в) өөн действиениң сылтаан, ноға иртчеткенін алай иртпинчеткенін: *Кічигде аны пу улуг аалда іче-пабазы, олған хазых **азырап полбин**, орысты кум идіп, кірөске түзіртірлер (Н.Тюкп.). Ол аны, Афанасха парып, анда **чуртабин**, нан килибіскеніне **хынмин**, соххан (А.А.);*

г) пірееде итірбинчеткен деепричастие өөн действиее тоғыр турғызылчатхан действиени таныхтапча: *Син, тоғысха **парбин**, нога мында одырчазың? (Одырарға чарабас – тоғысха параға кирек). Автобус, чолча **ойлабин**, сарынның сіліг көөнде агастар аразынча учухчатхан осхас*

(Н.Тюки.) (Чолча парарға кирек полған, ол, тізең, ағас аразынча (чол чох чирче) парча) ;

д) итірбинчеткен деепричастиее піреде сығынғы падежтің хозымы хозылча (пасха падежтернің хозымнары хозылбинчалар). Андада ол, аннан таныхтал парған действие тоозыл парзох, өөн действие пасталчатханын көзітче: *Хайзы, столдаң турбинаң, айран чохтаңар, абыртхы тартыбыс турған (М.Т.). Хайнапча чүреем минің, халбастанған харлар көрбинең (Н.Д.).*

Идер тоғыстар

1. Иділістерге хозымнар хозып, хығырыңар. Согласнай паза гласнай тапсағларға тоозылчатхан иділістерге хайдағ хозымнар хозылчатханын чоохтаңар.

I. -ып, -іп, -п:

хал — паста —

пас (з) — узу —

кил — кіле —

II. -а, -е, -и:

пар — сөле —

кис(з) — узу —

пас(з) — сағы —

ин — ойна —

2. Иділістердең піріктіріс деепричастииелері пүдіріңер. Олар хайдағ хозым пользиинаң пүткенін чоохтаңар. Деепричастииеліг 2–3 чоохтағ пүдіріңер.

Чурта, сарна, чахы, ойна, сілігле, арыңла, чары, чылтыра, чысхла, поғдарха, ут, ас, үгрен, пар, чүгүр, сат, кис, тонан, өкерсін, өңнен,

3. Иділістердең пірге деепричастиелер пүдіріңер. Оларны көзідім хоостыра итірбинчеткен формада турғызыңар, орта пазарын чарыдыңар.

Көзідім: *пар* — *пара* — *парбин*.

Пар, пөк, кил, чап, чыс, кис, чоохта, сөле, одыр, тур, хос, ал, көдіріл, ур, пир, учух, аахта, мүуре, хаахта, ойла, паарса, өрін.

4. Итірбинчеткен деепричастиелер пүдіріңер. Согласнай паза гласнай тапсағларға тоозылчатхан иділістерге хайдағ хозымнар хозылчатханын чоохтаңар.

пар — сом —

ал — ис —

ойна — хап —

сах — сох —

көр — сөк —

сап — төк —

5. Пирілген иділістердең иділбеен паза иділ парған көрімде турчатхан піріктіріс деепричастиелерін пүдіріңер. Оларнаң чоохтағлар пүдіріп, пазыңар.

Көзідім: *Үгрeнeргe* — *үгрeнiп* — *үгрeнiп алып*. *Школада үгрeнiп алып, Аймир университетке кірген.*

Үгрeнeргe, аларға, тоғынарға, имнeнeргe, аралазарға, марығлазарға.

6. Чоохтағларны хығырыңар. Итірбинчеткен деепричастиелерні таап, оларның хозымнарын таныхтаңар.

Минің порчочаам, өс син салымның, күнге салыхпин, салғахха саптырбин.

(В. Шул.). Пир чирде ыырчы, улуғ чолны піске пирерге хынмин, өнетін пиктеглер итгір. (И. Кост.) Іче-пабазы, олған хазых азырап полбин, орысты кум идіп, кірөске түзіртірлер. (Н. Тюкп.).

Тузаланчаң литература

1. Бабушкин, Г.Ф. Значение и функции хакасских деепричастий [Текст] / Г.Ф. Бабушкин // Ученые записки ХакНИИЯЛИ. Вып. X. – Абакан, 1964. – С. 14-25.
2. Грамматика хакасского языка [Текст] / Под ред. Баскакова Н.А. – М.: Наука, 1975. – С. 237-243.
3. Дыренкова, Н.П. Грамматика хакасского языка. Фонетика и морфология [Текст] / Н.П. Дыренкова. – Абакан: Хакоблнациздат, 1948. – 81 с.
4. Карпов, В.Г. Хакасский язык. Глагол (Неспрягаемые формы. Категории вида и залога). Учебное пособие (на хакасском языке) [Текст] / В.Г. Карпов. – Абакан: Издательство ХГУ им. Н.Ф. Катанова, 2002. – С. 39-51.
5. Карпов, В.Г. Хакасский язык: проблемы и перспективы развития: монографический сборник научных статей [Текст] / В.Г. Карпов. – Абакан: Издательство Хакасского государственного университета им. Н.Ф. Катанова, 2007. – С. 132-138.
6. Карпов, В.Г. Система глагола в современном хакасском языке. (Научный доклад, представленный к защите на соискание ученой степени доктора филологических наук) статей [Текст] / В.Г. Карпов. – М.: Институт языкознания РАН, 1995.
7. Патачакова, Д.Ф. Деепричастные формы в хакасском языке [Текст] / Д.Ф. Патачакова // Вопросы хакасского литературного языка. – Абакан, 1984. – С. 90-113.
8. Хакас тілі. Морфология 021700.02 Филология (Хакас тілі паза литература) специальностьча үгренчеткен студенттерге үгредіг пособие [Текст] / филнд Карповтың В.Г. редакциязынаң – Ағбан: Н.Ф. Катановтың адынаң Хакас хазна университетінің издательствозы, 2004. – С. 93-105.